

**Date – 26/02/2026**

**Time - 7:30 -7:40 Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES (MORNING)**

1. Vawiin Assembly Budget session chhonzawm turah Chief Minister, Finance changtu Pu Lalduhoman kum 2026-27 Budget a pharh ang.
2. Assembly Session thukhawm chuan The Mizoram State University (Amendment) Bill, 2026 chu lungrual takin an pawm.
3. Agriculture Minister Pu PC Vanlalruata'n tun dinhmunah SCC 64 zinga 4 atang chauhin sawhthing lei a la nih thu House a hrilh.
4. Horticulture Department Minister Pu C. Lalsawivunga'n Mizoram intodelhna hmanrua atan Sapthei chin beihpui thlak an tum thu a sawi.

<><><>

**ASSEMBLY-BUDGET**

Vawiin Mizoram Legislative Assembly Budget chhonzawm turah Chief Minister, Finance changtu Pu Lalduhoman kum 2026-27 chhung atana Mizoram sum hman tur Budget a pharh ang, hemi rual hian Dept hrang hrang sum hman tur indaihlohna puhrukna tur Supplementary Demand 2025-26 a pharh tel bawh ang.

<><><>

**MIZORAM STATE UNIVERSITY BILL**

**MIZORAM** Assembly Session thukhawm chuan The Mizoram State University (Amendment) Bill, 2026 chu lungrual takin an pawm.

Nimin sessiona Bill puluttu Minister Dr. Vanlalhlana chuan nikum 2025 March ni 4-a Mizoram Assembly Legislative-in The Mizoram State University Bill 2025 a pass hnu khan Mizoram State University din chhoh a nih theih nan hmala nghalin, hnathawktu tur post siam nghal a ni a, Post siam zinga a tul zualte lak nan advertisement pawh chhuah nghal a ni a ti a, Mizoram State University headquarter atan Aizawl Luangmuala Geology and Mining Department office chu tihfel tura hmalak a nih laiin, Bill pass a nih hma leh hnuaah Lunglei, Champhai, leh Mamit atang te in representation dawn a nih avangin NGO leh bialtu MLA te titi pui an nih hnuaah kum 2025 November ni 17-a Council of Minister thukhawm chuan ngun taka a ngaihtuahin Mizoram State University headquarter chu Lungleia dah turin a rel a,

nikum November ni 20 khan Chief Minister chuan Lungleiah Mizoram State University headquarter dah a nih tur thu a puang ta a ti.

He bill chungchangah hian enfiah tur tam tak a awm avangin Bill drafting committee din thar lehin, Act awmsa an ennawn a, Council of Minister phalna lak a nih hnuah vawiin hian Assembly Sessionah pharh a ni ta a. He bill kaihnawihana ngaihtuahnaa lian ber chu regional imbalance a nih thu sawiin, regional imbalance tihziaawm nan Lungleiah dah a nih thu sawiin, Bill tharah hian Section pathumah tihdanglam a awm tih a sawi a ni.

Minister Dr Vanlalhlana

He bill hi Lunglei West Bialtu Pu T Lalhlimpua, Lunglei South Bialtu Pu Lalramliana, Lunglei North Bialtu Pu V. Malsawmtluanga leh Lunglei East Bialtu Pi Lalrinpuui, te chuan he bill hi an thlawp thu sawiin, Aizawl-ah zirna sang tha tak tak a awm tawh avangin leh kum 2011 chhiarpuiah Aizawl tih lohah Lunglei district-a mipui cheng zat an tam fal bawk avangin Lungleia Mizoram State University dah tura Council of Minister in an rel chu lawmawm an tih thu an sawi a. Champhai North bialtu Pu H. Ginzalala, leh Champhai South bialtu Clement Lalhmingthanga leh East Tuipui bialtu Pu Ramthanmawia te chuan Mizoram State University chu Champhaia dah tura an ngen chungah Lungleia Mizoram State University dah a ni tur chu an lawmpui rualin, a lehpekah chuan Champhai District tan Mizoram sorkar tan thil ropui tak a tih sak ve tawh an beisei an ti a,

Mizoram sorkarin hmasawna chu Aizawl-ah chauh ni lova a semzai chu lawmawm an tih thu an sawi bawk a ni.

Leader of Opposition Pu Lalchhandama Ralte chuan Lungleiin Amendment chauha Mizoram State University an nei tur chu an thlawp lova, Aizawl tan tura siam tawh Mizoram State University bill chu sut-in bill thar hlak siamsak turin an phut tih a sawi a ni.

Leader of Opposition

He bill hi member 20 chuangin an sawiho hnuah House chuan a pawm a ni.



## G R A M G

Thingtlang miharsate tan a Ni 100 inhlawhna (MGNREGA) thlakna tur Viksit Bharat - G R A M G chungchang Mamit thuthar thehdarhtute hnen a inhrilhriatna chu Mamit DRDO Project Director pu Malsawmzuala hovin nimin khan a office chamber-ah neih a ni.

Pu Malsawmzuala chuan Viksit Bharat - G R A M G chu Ni 100 inhlawhna thlakna tura Sorkar laipui in a rawn duan anih piah lamah Kum 2047 ah India ram chu ram changkang anih tumna kawnga lo in buatsaihna anih thu a sawi a, Viksit Bharat - G R A M G chu tun kum 2026 sorkar kum thar atanga hman tan tawh tur a ni a, sorkar kum khat chhungin Ni 100 inhlawhna neih thin chu Ni 125 inhlawhna neih thin tawh tur a nih thu a sawi bawk.

Mamit DRDO Project Director Pu Malsawmzuala chuan Viksit Bharat - G RAM G hnuaiah khua rei atana tui leh lui humhalh te, thingtlang mamawh hna hrang hrang te, mipui leh Self Help Group te eizawna humhalh te leh ramngaw leh thing humhalh a, thingtlang miten khua rei atana an chhawr theih tur hna hrang hrangte dah pawimawh tur a ni a ti.

Viksit Bharat - G RAM G ah chuan loneitute dah pawimawh an nih avangin buh seng buai lai chuan chawlh lai lawk phal sak anih angin Mizoram ah pawh June ni 15 atanga July ni 14 leh December ni 15 atanga January ni 13 inkar chhungin inhlawhna siam loh tura ruah hman a ni bawk.

Viksit Bharat - G RAM G ah hian Sorkar laipui lamin sum zaa 90 a tum anga Mizoram sorkar in za 10 a tum ve thung dawn a ni.

Hetih lai hian tun dinhmunah Mamit district ah MGNREGA job card nei mi sing2 sang3 za7 leh 17 awm mekin Ni 97 inhlawhna siam tawh a ni.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

#### GINGER

Agriculture Minister Pu PC Vanlalruata'n tun thla February ni 2 atangin sorkarin sawhthing lei tan tum mahse tun dinhmunah SCC 64 zinga 4 atang chauhin lei a la nih thu House a hrilh.

He thu hi nimin Assembly thutkhawma Lawngtlai West Bialtu Pu Ngunlianchunga zawhnaa chhannaah sawiin, Agriculture Minister chuan sawhthing lei tia sawi chu sorkarin loneitute hnen atanga lei ni lovin, support price a pe tihna ni a ti a, hetihlai hian nikumah sawhthing rate a chhiat em avangin sorkar chuan loneitute chu lei sakin Sairang-a buffer stock-aha dah sak a, sum sen so a san avangin kuminah sorkarin a tlin tawh lo tih sawiin Siliguri leh Delhi Mandi rate milin District tinah sawhthing rate tur Floor Price siamin, kg-ah cheng 40 atanga cheng 45 inkar floor price an siam a ti a, sawhthing leitu tur ten an dawn ve reng avangin kg-ah cheng 30 atanga cheng 35 ah an tihnam a, tun dinhmunah Secondary Collection Centre (SCC) 64 zinga 4- Khuangleng SCC, Cherhlun SCC, West Phaileng SCC leh Tuipang SCC-ah te sorkar floor price angin sawhthing hralh mek tih a sawi.

#### *Agriculture Minister*

Agriculture Minister chuan Mizoram sawhthing chu tha bikin, chemical tel mang lo, organic tluk a nih avangin miin an duh bik hle a ti a, Chief Minister Pu Lalduhoma hovin NITI Aayog hotute nen Mizoram thar chhuah sawhthing sawiho a ni tawh a, Mizoram sawhthing thar chhuah quality tha tak chu ramchhung mai ni lovin

khawvelin a hre chho mek tih sawiin sawhthing chu man tlawma hralh phal lo turin loneitute pawh an zirtir mek tih a sawi a ni.

### ***Agriculture Minister***

Zawh belhna chhangin Minister chuan sawhthing-ah 3rd party an inrawlh reng tih sawiin, tun dinhmunah Burma sawhthing lo lut mek a awm a ti a, hemi venpui tur hian Home Department hnenah ngenna an thlen tawh a ti a, ram thenawm Bangladesh chu sawhthing lei nasa tak ni thin mah se, an ram a buai tak avang leh kawng that loh avangin kuminah chuan Bangladesh lamah sawhthing hralh chhuah tum a nih loh thu a sawi a. Hei bakah hian kum 2026-2027 chhung hian Sorkar chuan thlai thlan chhuah bikte sawhthing, hmarcha, ruahmanna a siam a ni a, kum 2026-2027 chhungin Agriculture & Farmers' Welfare Department hnuaiah cheng vbc 150 dah tum a nih thu a sawi bawk.



### **HORTICULTURE MINISTER**

Horticulture Department Minister Pu C. Lalsawivunga'n Mizoram intodelhna hmanrua atan Sapthei chin beihpui thlak an tum thu a sawi.

Nimina Assembly thutkhawma zawhna leh chhanna hunah he thu hi sawiin Horticulture Minister Pu C. Lalsawivunga chuan Mizorama sapthei chuan chungnun bik na riau an nei a ti a, state dang ten ching ve mahse Mizoram-a sapthei tharchhuah te an tluk loh thu sawiin, nikum atangin pilot project siam ni tawhin District hrang hrang Champhai, Khawzawl, Serchhip, Saitual leh Aizawl ah beihpui thlak a nih tur thu a sawi a, Mizorama sapthei chin chu India ram hmun dangah a awm ve loh avangin hram ei leh bar hmasawna leh kuthnathawk tute tan intodelhna hmanrua tha tak leh kawng pawimawh tak anih theih an beisei thu a sawi a, India ramah a market a awlsam mai bakah khawvela huap pawh market harsatna a awm loh avangin Mizoram ti hmingtha thei tur khawpa Sapthei ah hian beihpui thlak an tum thu a sawi a ni.

### ***Horticulture Minister***

Hei bakah hian Post Harvest Management hnuaiah kuthnathawktute tan pack house leh preservation unit chu thlai thar tamna District hrang hrang ah dah sak vek tawh a nih thu a sawi a, sorkar in thlai chi lei tura ruahmanna a siam mek thu sawiin thlai chi lei nan hian cheng nuai 60 dah anih thu a sawi bawk.

Hei bakah hian nikum lama Cyclone Remal avanga thlai chingtuten harsatna an tawh chi hrang hrang puhrukna atan NDRF atangin atan cheng nuai 29 leh SASCI atangin cheng vbch 3 chuang zangnadawma an dawn tawh thu a sawi bawk.



### **BOY DROWN**

Saiphai khua naupang kum 2 mi Blessing Lalmalsawma chu nimin chhun khan tuizemah a tla hlum.

Saiphai VCP Pu Lalthansanga hnen aṭanga thu dawn danin Blessing Lalmalsawma hi mi inah lengin an lenna in bul Tanky chung rangva a khuh chungah tanky neituten naupang infiamna an silfai an phova, chu mi an pho chu va lak a tum ni a rin a ni a. Rangva a khuh mai mai a nih takah chuan rangva hi chhinphui chat a ni lo va. A karah a tla lut nia hriat a ni.

Blessing Lalmalsawma hi vawiin hian Saiphai Chhim Veng thlanmualah vui a ni ang.

